

# D`Rumpelsuris 2019

„Dört isch links, nei do isch`s doch, jetzt chummi nümmi druss  
Mir müen füre, das isch hintere - was schwätzisch du für Schtuss?  
Orientierigslos, kei Plan was lauft, do merke mir scho gli  
Cha das nur e Schpieler vom FC Basel sii

Dr Boole isch am Dorffescht d`Schissi überloffte  
Zum Glügg het denn dr Däddi mit sim Schlüüchli d`Doole troffe  
So vill Schissi uf eim Huffe, s`schtinggt scho zum Verwäse  
Chasch normalerwiis numme im Bibo läse

Dr Frauearzt vom Megan seit: „Make jetzt not e Gschrei  
You really need a Kaiserschnitt that is zwiifelsfrei  
That Chind wird definitely not normal gebore  
Will it has geerbt em Opi Charlie sini Ohre“

Rüsigbäse sin als wie meh us dr Mode cho  
Hüt wird für diä Arbet dr Laubblöser füüre gno  
Mi usbruucht Bäse hän d`Därwiler dringend mitnäh welle  
Um en alls Wiehnachtsbaum uf ihre Dorfplatz z`schtelle

Dr Neymar liggt und brielt und liggt und denn gheit är uf d`Schnuure  
Schoht quält uf, schtrehlt sich no schnäll dur si Frisürli duure  
Dr Özil und sini Auge hogge uf dr Bangg  
Im nöggste Momänt sin d`Schwoobe duss-  
jä herrlig Gott sei dangg  
D`Italiäner laufe sich ihri Füess fascht wund  
Jä bim Pizzaliefere gohts an dr WM rund  
Em Messi sini WM isch nit grad super gloffe  
Drfür het sich uf dr Tribüni dr Maradonna übertroffe  
Wunderschön isch d`Geschte vo de „Schwizer“ überecho  
Hän diä doch gäge d`Serbe d`Friedenstuube schtiige lo  
Und s`Final in Moskau het denn ändlig - das isch gschpunne  
Zum aller aller erschte Mol diä französische Nationalmannschaft us  
afrikanische Kolonie mit Migrationshintergrund gwunne

Doppeltrottel Xhaka und dr Giftzwärg Shaq  
Schwinge ihri Händ - was erwartisch vo so Pagg  
Uf d`Frog wieso är mitmacht het meint dr Lichtsteiner konschterniert  
„Ich han mich nur so guet wiäs gaht i d`Schwizernati integriert“

750 Joor Ettigä dr Brun sött s`Fleisch go bringe  
In sim Zuestand will ihm das denn leider fascht nüm glinge  
D`Verzwiiflig gseht me ihm denn doch e bitzeli a  
„Kei Problem“, meint d`Chleitierpraxis „chasch unseri Räschte ha!“

„Blb blb blb, ich bi so toll, pff pff, nanana  
Bäh bäh wäh wäh, ihr sind doof, gaack gaack, blablabla  
Mimimimi, mäh mäh muh, igi bigi boh“  
Und scho het dr Trump e neue Twitter useglo

Zu sim 99. Titel meint dr Roger zwiifellos  
Är will no witter gwünne, si Hunger dä sigg gross  
Für e wittere Titel möcht är jetzt alli Chraft ufwände  
Will är möcht umsverregge nit als 99er ände

Dr Däddi Urs fahrt mit em Pfufer bis zum Guggerhuus  
Dr Hansruedi brichtet denn, me merkt jä dä chunnt druus  
Treberwürscht und Wii gitts denn für e Ranze  
Und am Schluss do sehsch no s`Rumpelschtizli umme danze

E sälbschtverliebte Därwiler will Ettigä präsentiere  
Für das würde mir s`Duo Schwizi/Männeli nominiere  
Diä zwei würde alles wüsse - do würd nüt abrenne  
Will sie z`Ettige jede Egge und jedes Gebüsch guet kenne